



Glenn Maxwell taküm
IPL masayatsü

Parliament nung SIR ken o
sensaksemtsü sorkar renema lir: Rijiju



Tizit Division nung Foothills Road yangluba semdang

Dimapur, December 2, 2025 (TYO): NFHRCC-i Konyak Union, KU unit Tizit Sector, contractor firm M/S Onkho Constructions & Suppliers, bangdak Department aser CSOs lennirtem senden ka menogo.

November 29, 2025 nü Tizit Unit, Konyak Union Office indang Conference Hall nung senden amending two lane Foothills Road tamasa renemtsü aser iba sülen jiang tanga four lanes mapa tenzüksü bangjemtepa liasü.

Mon District telongtet nung tang teyangludak Foothills Road ya Konyak Union, bangdak Department aser NFHRCC külemi tenük yoka reprangtsü ta senden nungsa lemtetogo.

Mapa inyakba mongpu aruogo anungji Nagaland nung tanüngba divisions nung SASCI Scheme kübok second Phase work order agütsütsüla ta parnokisa telemtepa agi.

NFHRCC-i anir teshimtet teloki Tizit Sub Division nung Lapa Lampong point nungi Sufury Bridge tashi mapa inyakba reprangdanga liasü. Idangji contractor-i mapa menur

tenzükba agi mapang talila meshisem aser March 2025 tashi nung renemtsü ta ashi.

Iba atema NFHRCC-i bangdak Department dangi mapang meshilokba official letter ka zülutsü aser iba copy ka parnok ket nung agütsütsü ashi.

Inspection team-isa M/S Shangpoh Konyak (NPWD Cl - 1/961) dang Tehak River madak 11.80 m RCC Solid Slab Bridge mapa tenzüksü ayongzüka liasü.

Konyak Union President K Yanmao Konyak-i anir pa den külem inyakertemi Contractor firms, bangdak department aser committee den amalitepa yaritepba atema tenütsang agütsür ta Media Cell, NFHRCC-i sangdong ka nung ashi.

NFHRCC-isa Nagaland Chief Minister N. Rio aser par cabinet züngsemtem dang Tizit nungi Khelma tashi Foothills road developmental project kümdaktsüba atema tenütsang agütsü.

Iba Nagaland Survival road tekaratiba nung yangluzüksü atema sorkar den amalitepa yariteptsü ta NFHRCC-isa metetdaktsüogo.

NIFT BOC nung Phangnon Konyak shim

Dimapur, December 2, 2025 (TYO): National Institute of Fashion Technology (NIFT) nung Board of Governors züngsem asütsü atema Nagaland Rajya Sabha MP S. Phangnon

Konyak shimogo.

Rajya Sabha nung Chairman C. P. Radhakrishnan-i S. Phangnon Konyak shim aser iba osang ya Rajya Sabha Secretariat-i metetdaktsüogo.

NBSE-i question paper tim mesüi amshirtem merenshitsüla: NSF

Dimapur, December 2, 2025 (TYO): Tang tagidak Class IX Final Examination 2025 Phase-II nung question paper tim mesüi prokshirtem merenshiang ta Naga Students' Federation (NSF)-i Nagaland Board of School Education (NBSE) dang shiogo.

"Iba mapa inyakba atema sioki ia bilemer aser NBSE-ia December 1 nü osang jangjashitsüogo. Ibalä inyakyim ajanga evaluation system nung tarak kettsür aser public-i school tatidang agibayim nung temulung melemettsüsa akümer" ta NSF-i

NBSE Chairperson dangi shidi ka züluogo.

NBSE-i aiben tetuyuba agüjaka aser safety protocols metetdakjaka ibala mapa inyakba atema mepelar, kechiyong iba ajanga kaketshir meyrjang aika dak kongshir ta NSF-isa ashi.

NBSE-i mapang shitak nung tatidang akangshir agiba aser khen atema subject 4 indang results sota ataba atema tenütsang agütsür. Tarutsü nung ozüing alema meinyaktsü atema tatishitsü asütsüsa temerenshi agütsütsüla ta NSF-isa ashi.

Hornbill Festival nung Cultural Show agiogo

Dimapur, December 2, 2025 (TYO): Naga Heritage Village, Kisama nung Hornbill Festival, 2025 anogo 2 buba nung Cultural Show kanga meraketa agiogo.

Iba sentong atema host Deputy Chief Minister, T.R. Zeliang aser co-host Land Resources Advisor G. Ikuto Zhimomi na liasü.

Sentong nungsa tetushia süa jaokertemji Ambassador of France to India Thierry Mathou, Gauhati High Court nung Chief Justice Justice Ashutosh Kumar aser tangartem liasü.

Cultural Show nung Angami teloki Phita, Ao teloki Nokinketer,

Chakhesang teloki Lika/ Thüciükhü aser Chang teloki Bu Sen Oneed ia sayu.

Maneni, Garo teloki Wangala Dance, Khiamniungan teloki Jamhang, Kachari teloki Bima Thanai, Konyak teloki Shim Shut Boa, Kuki teloki Jangcha Lamaser Lotha teloki Kongtsu Kongyaa ia sayu.

Phom teloki Yapo Louh-Po, Pochury teloki Hapie Hapie, Rengma teloki Tufu Kethyu, Sangtam teloki Shiru Kyucho Khi, Sumi teloki Imuno Pi Sujo, Tikhir teloki Tsonglak Tsin, Yimkhiung teloki Hi Chu Khun aser Zeliang teloki Matha-Bu Lin ia sentong tembang.

IDAN aser Toyota Kirloskar Motor tsüngda MoU nung sign sütep



Kohima, December 2, 2025 (TYO): Mongulbarnü Toyota Kirloskar Motor Pvt. Ltd.

(TKM) aser Investment & Development Authority of Nagaland (IDAN) tsüngda Memorandum of Understanding (MoU) ka nung sign sütepogo.

Nagaland nung health aser education sectors akangshitsü atema iba MoU nung sign sütepa liasü.

MoU kübok essential facilities tajungba akümtsü, services ulushitsü aser rural o urban healthcare systems tashi itshitsü lateta lir.

Külen, education maparen nung infrastructural improvements, digital learning,

aser skill development nungita yaritsü ta MoU nung shia lir.

Toyota Kirloskar Motor (TKM) Pvt. Ltd. ajanga Nagaland nung temelenshi bener arutsü nangzüka atema tenütsang agütsür. IDAN den tesentaktep yangluba ajanga nübortem asoshi tajangzüka aika bentsür arutsü imlar ta Nagaland sorkari metetdaktsüogo.

"Hornbill Festival ya benjungbentsü aser pelatepba mapang ka dang masü saka Nagaland nung alirtem asoshi tesentaktep aser maongkatem bentsür aruba mapang ka kümogo" ta IDAN Chairman Abu Metha-i ashi.

Iba MoU ya mapang tatsüka

tsüngda shisadanger yangluba lir aser Toyota-i kanga dang kara maparen inyaba atema tenütsang agütsür ta pai ashi.

Company indang tongti tebilembaji "Child to Community Development" lir. Tanur ka renlokdang lokti ajunga renloker, aser iba ya healthcare, education, aser holistic social progress den putepa lir ta Toyota Kirloskar nungi Sudeep Dalvi-i ashi.

"Nagaland nung healthcare aser education asoshi kanga temulung agütsür. Iba MoU ajanga yimtsüng nung alirtem taküm tajungba akümtsü. Yimtsüngtem nung infrastructure tsütsü teinyaktsütem aser skill development tayongzükbatem kanga lir" ta Chief Minister Neiphiu Rio-i ashi.

"Toyota Kirloskar ajanga mapa tajungtem inyakba atema pelar. Tawa Toyota manufacturing facility aser TKM Pvt. Ltd. ajanga lapokba shisaliok reju semdangdang experiential learning aser holistic development ngua liasü aser iba ajanga quality education ajanga tanurtem tarutsü atema renemba ajiteta liasü" ta CM Rio-i ashi.

MP Supongmeren-i Akashvani aser Doordarshan Kendra khuret lemsatep

Kohima, December 2, 2025 (TYO): Nagaland nung public broadcasting institutions nung ketdangsübaren aser inyakshangshi nung tebilemtsü tulu lir ta MP Supongmeren Jamir-i metetdaktsüogo.

December 1, 2025 nü Lok Sabha nung MP Supongmeren-i Ministry of Information & Broadcasting dang Kohima nung Akashvani Kendra aser Doordarshan Kendra nung staff meperiba aser ketdangsütsüpur maliba khuret lemsatep.

Akashvani Kendra Kohima nung sanctioned posts 260 nungi 90 nung shimogo lir aser mapa tazüing 170 lir ta pai ashi.

Doordarshan Kendra Kohima nunga sanctioned post 144 lir

saka tang nisung 55 dang lir aser mapa tazüing 89 lir ta MP Supongmeren-i metetdaktsü.

Kohima nung Kendra anaprong nung full-time Head of Office (Station Director) mali aser tang Dibrugarh, Assam nung amenoka aliba Deputy Director General (DDG) kati dang ketdangsür. Iba ajanga anogoshia mapa inyakba nung tetsükdaktsü ajurur, mapang shitak nung lemtet magiteter, temelaba mangur aser Nagaland ajungalen broadcast activities o maintenance centres tiptema ketdang mesüteter, ta paisa ashi.

Iba önük atema MP Supongmeren-i Kohima nung Akashvani aser Doordarshan Kendra anaprong nung full-time

Heads of Office shimtsü takhangba agütsü.

Paisa mapa tazüingtem nung nisung shimoktsü aser AIR Kohima o Local Radio Station, Mokokchung nung Technical Assistants (TAs) aser Junior Technical Assistants (JTAs) dena technical staff shimoktsü metetdaktsüogo.

Nagaland nung alirtemi iba tebilemtsü ya bangdakpurtem dangi abentsü aser public service broadcasters tashi itta maküm tashi rongshitsü. Akashvani aser Doordarshan nung staff peria ayutsübaji ketdangsübaren atema nüngdak ka dang masü saka democratic nüngdak ka lir, ta MP Supongmeren-isa Lok Sabha nung ashi.

Toyota Hornbill Music Festival 2025 tenzükogo

Kohima, December 2, 2025 (TYO): India nung music festival tulutiba Toyota Hornbill Music Festival 2025 Mongulbar nungi tenzükogo.

Tourism & Higher Education Minister Temjen Imna Along aser Toyota o TaFMA ketdangsürtem lia Naga Heritage Village Kisama nung iba kenten benjung tenzü.

Toyota Kirloskar Motor Pvt Ltd nung Deputy Managing Director Tadashi Asazuma aser Toyota Tsusho India Pvt Limited nung Deputy Managing Director Taisukhe Aoyama nati tsüingtsüng ka tema iba kenten benjung sayatsü.

"Hornbill Festival ya India nung cultural phenomena tongtipangtiba kümogo aser Toyota Hornbill Music Festival ya northeast nung music talent

tajungtiba sayudak ka kümogo" ta Okusa Toyota, Nagaland nung Managing Director Y. Vikheho Swu-i o jembidang ashi.

"Tanü tashi nung Toyota Hornbill Music Festival ajanga international bands aika anir aruogo" ta pai ashi.

"Dr. Neiphiu Rio lenisüba ajanga Hornbill Festival tamendakdak yangluba dang masü saka senmangtem wazüka ayur aser contemporary artist expression ajungketer" ta paisa metetdaktsü.

Iba benjung nung Advisor to Chief Minister Abu Metha-ia tongtipang shilem agiba atema pelar ta Swu-isa shisem.

Tourism minister Temjen Imna Along-i anir Department of Tourism ajanga kümshia Hornbill Festival temaba jenjangi anir

atuba atema pelar ta paisa metetdaktsü.

"Toyota nung onoki music ya tesentaktep aser temelenshi atema wadang tajung ka ta amanger. Iba tamang nung ajemdaker onoki Hornbill Festival 2025 nung official partner ka ama nüma tanga yariteper" ta paisa ashi.


Toyota Hornbill Music Festival 2025 tenzükba sentong nung Rumac (Scotland), Drum Tao (Japan), Japan Junior Orchestra (Japan) aser Agniva (France) teloktemi shilem agia liasü.

DECEMBER 3 LINE-UP

Mapang : 5:00 ako (Unity Arena, Kisama)

*** Novo (Assam)
* Mongdoll (South Korea)
* Trance Effect (Nagaland)**

Kohima Press Club-i züluba kaket ka CM Rio-i sayatsü



(Abelen nungi achichi) Kaket zülur Vishü Rita Krocha, General Secretary KPC; Alice Yhoshü, President KPC; Chief Minister, Neiphiu Rio & Advisor to CM & Chairman IDAN, Abu Metha nungertem Kisama nung December 2 nü "Journey of Hornbill Festival: Through the lens of Kohima Press Club" kaket sayaba mapang tangokba noksa nung angur.

Kohima, Luchii/December 02 (TYO): Hornbill Festival mezüing 2000 küm amung tenzükba nungi mungyonga aruba indang "Journey of the Hornbill Festival: Through the lens of Kohima Press Club" nüngja agütsür kaket ka tanü Kisama nung Nagaland Chief Minister, Dr. Neiphiu Rio-i sayatsü.

Iba sentong nung jembidangm Kohima Press Club züngsemtem lia iba kaket sayatsüba atema pelar ta CM Rio-i ashi.

Iba kaket ya tongtipang document ka lir ta pai ashi aser KPC züngsem nem tenüngsang agütsü aser iba kaket azüngtsü yongyar ta shia liasü.

Advisor to Chief Minister &

Chairman, Investment Development Authority of Nagaland (IDAN), Abu Metha-i iba kaket züngogo aser KPC-i mapa tajung inyakogo ta ashi.

'Journey of Hornbill Festival: Through the lens of Kohima Press Club' ya Alice Yhoshü aser Vishü Rita Krocha nati zülü aser PenThrill nung menüing, koba Department of Tourism ajanga senotsü teyari agüja liasü.

Iba kaket züluba nung KPC züngsem Asonuo, Atono Tsükrü Kense, Chizokho Vero, Medolenuo Ambrocia, aser Reyivolu Rhakho nungeria shilem agia lir.

Kohima Local Ground nung 2000 küm iba benjongmung

tenzükba mapang Restricted Area Permit (RAP) aser Inner Line Permit (ILP) angutsü kanga tasak liasü aser mungyonga arudang Hornbill Festival tajungba kuma melenshia arur, ta kaket zülurtemi kaket nung shia lir.

2026 küm January 20 nü küm 25 ajungba jubilee amungtsü aliba Kohima Press Club ajanga Hornbill Festival küm 25 amungba indang document bendenba ya tongtipang mapa ka lir, ta ashi.

Iba kaket ya ka nung sen 1500 aser kaket nung Dr. S.C. Jamir den sensaksemba nung ajemdaker otsü kar lir, shiba chief minister inyakba mapang Hornbill Festival ya amungtsü sentong yanglu.

Kisama nung HIPFEST 2025 tenzükogo



Dimapur, Luchii/December 02 (TYO): Hornbill Festival nung tongtipang shilem ka ama Hornbill International Photo Fest (HIPFEST) sentong December 2, 2025 nü Naga Heritage Village, Kisama nung tenzükogo.

Iba sentong ya Ambassador of Switzerland, H.E. Maya Tissafi-i tenzüksü.

Iba sentong nung jembidang H.E. Maya Tissafi-i iba ya la aser Hornbill Festival 2025 benjongmung 'partner' Switzerland atema mapang tajung ka lir ta ashi.

Lai Naga nunger sobaliba saklokba indang lemsatap aser state terenlok atema skilled professionals nüngdaker ta ashi aser Switzerland tatishitsü amshi, kong nütsüing yongsük shilem 70 shi vocational training ang bushir aser shilem 30 dang university education agir ta ashi.

Noksa tangoker aser artistes densema skills balala alirtemi lokti aintsü asoshi tongtipang shilem agir aser Nagaland den sendaktepba ya tarutsü nung maneni aintsü aser külemi inyaksü asoshi sapang tali lapoktsü imlar ta ashi.

Commissioner & Secretary of Information and Public Relations and Co-operation, Orenthung Lotha-i pela agizükba o jembidang, HIPFEST tajungba kuma ainba indang lemsatapa liasü.

Pai iba ya "Window to Nagaland" lir, kong state alinük aser sobaliba tebour ajung angur, ta ashi.

Iba benjong ajanga noksa tangoker tem pei sempet sayutsü asoshi alima sapang ka agütsür ta ashi aser Ambassador Tissafi pela agizük, shiba den Simon Sevan Schafer, Head of Culture,

Human Security and Legal Affairs, Embassy of Switzerland in India and Bhutan dena liasü.

HIPFEST co-organizer aser Portrait Studio kibur M. Ababe Ezung-i taküm iba benjongmung nung state tesem balala nungi noksa tangoker 97-i shilem agir ta sangdong.

Paisa Air India Express den partnership tasen yangluba indanga metetdaksü aser takok angur nem flight vouchers sempet agütsütsü ta ashi.

HIPFEST 2025 tetendanger ya ajaki kanga junga meteta aliba noksa tangoker M. Doulo, Parvez Akhtar, aser Basu Dutta Sarkar alitsü.

Taküm HIPFEST exhibition ya World War II Museum area nung alitsü, kong nüburtemi December 2-10 anogotem Nagaland tebour ajungba noksa tem reprangtetsü.

Bamboo & Banana Stem Cutting competition ayongzük

Dimapur, Luchii/December 02 (TYO): Department of Tribal Affairs ajanga ayongzükba mezüingbuba State-Level Tribal Bamboo Cutting Competition and Tribal Banana Stem Cutting Competition sentong NSF Solidarity Park, Kohima nung December 2, 2025 nü agia liasü, koba Janjatiya Gaurav Varsh anogomung nung lisopur sobaliba aser yimsüyimpom benjongmung ka lir.

Iba sentong ya Hornbill Festival nung shilem ka ama

ayongzük, aser Ministry of Tribal Affairs, Government of India ajanga sponsor asü.

Kin 17 nungi nisung 34-i iba tetoktepba nung shilem agia liasü. Bamboo Cutting Competition nung Zeliang kin-i mezüingbuba jenjang, Lotha kin-i tanabuba aser Pochury kin-i tasembuba jenjang ngutet.

Banana Stem Cutting Competition nung Chang kin-i mezüingbuba jenjang, iba sülen Kuki kin-i tanabuba jenjang aser Angami kin-i tasembuba jenjang nguteta liasü.

Mokokchung nung yi jenti apu



Dimapur, Luchii/December 02 (TYO): Assam nungi

Indian Made Foreign Liquor (IMFL) belenba osang tejangja ka November 28, 2025 aonung 9:30 meta angazükba nung ajemdaker Addl. SP Mokokchung-i anir telok kati Kinunger Village indang approach road nung pick up gair B/R No AS-02/ DC-0436 (Tata-Yodha) ka nungi MC rum 180 ml bottle 6240, MC Rum 375 ml

bottle 840 aser Kingfisher Beer cane 1104 nguteta liasü, ta Mokokchung Police sangdong

ka ajanga ashi.

Iba dak sendakba nung gari indang handyman aser yi kibur Arup Payeng (22 Yrs), S/O-Anil Payeng, V/O-Michinggaon Sonwal, PS Mariani, District-Jorhat (Assam) aser Imkongnichet (31 Yrs), S/O-Likazung, V/O-Chungtia, PO/PS-PS-II Mokohehung. District-Mokokchung apu.

Iba dak sendakba nung NLTP Act kübok ken o ka benoka Court nem agütsüogo, ta sangdong ajanga ashi.

World War II Peace Rally ayongzük



Dimapur, Luchii/December 02 (TYO): Battle of Kohima nung tongtipang shilem ka ama Hornbill International Photo Fest (HIPFEST) sentong December 2, 2025 nü WW II Museum, Naga Heritage village, Kisama nung ayongzükba liasü.

Hornbill Festival Chief Host & Nagaland Chief Minister, Dr. Neiphiu Rio-i iba sentong nung o tatsüka jembidangm iba rally ajanga 'Rara madak yimjung agi takok angutsü' ta sayur aser linük ajunga nem yimjung osang agütsür, ta ashi.

Battle of Kohima ya asen Naga nunger rara masü saka danga linüktem tsüingta raraba lir aser Naga nunger dak tamajungtiba kongshi, ta pai ashi.

Iba rally yagi asen Naga nungeri takum bendanga agütsüba asoshi akum agütsür aser parnok bilemteter aser yimjung nung alitsü maneni akangshir.

Nagaland Flat Fenders Club aser Nagaland Adventure & Motor Sports Association ajanga iba sentong ayongzükba atema CM Rio-i pelaba lemsatapa liasü.

Iba sentong nung Most Original Vehicle sempet Dr. Andrew Ahuto, Best Maintained Vehicle sempet T. John Longkumer, Best Uniformed Squad sempet Mhashevoto aser Best Weaponry sempet R.T. Chang nem agüja liasü.

Census 2027 shilem ana küma lemsar agitsü: sorkar

New Delhi, Luchii/December 2
(Agencies): Census 2027 ya
shilem ana kuma lemsar agitsü.
Mezüngbuba shilem 2026 küm
April nungi September tashi aser
tanabuba shilem 2027 küm
February ita agitsü, ta
Mongolbarnü Lok Sabha nung
metetdaksüogo.

Congress MP Rahul Gandhi-i
asüngdangba langzüba mapang
Minister of State for Home
Affairs Nityanand Rai-i, shilem
ana küma lemsaba ya
mezüngbuba nung House Listing
aser Housing Census alitsü aser
tanabuba shilem ya Population
Enumeration (PE) asütsü.

State/UT temi parnok sasep
nung April nungi September 2026

tashi mezügbuba shilem ya
anogo 30 tsüngda benoka
inyaktsü.

"Population Enumeration ya February 2027 nū agitsū aser reference date ji March 1, 2027 00:00 hours asütü, saka Ladakh Union territory, Jammu and Kashmir Union territory kübok snow-bound non-synchronous tesemtem aser Himachal Pradesh aser Uttarakhand nungbo 2026 kük September ita agitsū aser reference date ji October 1, 2026, 00.00 hours asütü," ta pai ashi.

Minister-isa, inyakyim benoka
inyaktsü aliba shia ministry,
department, lokti tentet balala
aser census data amshirtem
nungi shisatsü agiba sülen census

questionnaire tembanga yang lur,
ta ashi.

Minister-i ashiba agi, census
ya küm 150 dak tema agia arun
aser taoba mapang inyakyimtem
nungi angazükbatem taruba
census magi tsüngda asadanger.

Tanga tasüngdangba ka
langzüba mapang minister-i,
caste enumeration ya Political
Affairs nung Cabinet
Committee-i taküm April 30 nü
lemtetba ama census agiba
mapang agitsü, ta shisem.

Maneni minister-i ashiba agi, Census 2027 ya digital ajanga asütsü aser data ya mobile apps ajanga bendentsü aser iba den peisasa züngoksemtsü atema online nung lenmang lapoktsütsü.

Parliament nung SIR ken o sensaksemtsü sorkar renema lir: Rijju

New Delhi, Luchii/December 2 (Agencies): Parliamentary affairs minister Kiren Rijiju-i Mongolbarnü Opposition-i electoral rolls atema special intensive revision (SIR) ken o tangsa tang sensaksemtsü akhangba dak sendakba nung sorkari ken o sensaksemtsü mulunga lir, saka mapang atakzüka yur inyaksangshi masütsü ta shiogo.

Opposition-i iba inyakyim indang sensaksemtsü khanga Parliament Winter Session rongrong adoka tenzükba sülen pai iba olen ya lemsatepogo. Iba inyakyim anema House anaprongla nung Opposition party-i longkak aita liasü.

Mongolbarnü Opposition
party temi SIR ken o ya kanga
tongtibangsa sensaksemtsü
khanga Rajya Sabha nungi

tugua liasü. "SIR inyakyim
ajanga nisung asür," ta TMC
lenir Derek O'Brien-i ashi.
Ajisüaka parliamentary affairs
minister-i renema aliba ama
'Vande Mataram' ken o tama
sensak asemtsü ta ashi. "Vande
Mataram ya asenok nüjiso
atema raraba dak sendaka lir,"
ta Rijiju-i ashi.

Rajya Sabha nung
Opposition lenir Mallikarjun
Kharge nem telangzüba
agütsüba mapang Rijiju-i,
"imlibelema ken o kecha nunga
mapang atakzüka tetoktsü," ta
ashi. Paisa, House nung iba ken
o benoka sensak masem tsüngda
party balala nungi lenirtem den
sensak asemtsü, ta ashi.

Maneni pai Parliament ya
sensaksem ajanga
inyaksangshitsüla ta ashi.
"nenoki mapang indang

ashishiba sülen tebilemtsü ya
tenzüker. Ajakbo mechanical
mesütettsü. Parliamentary
democracy nung asenoki takok
tashi sensak asemtsüla," ta pai
ashi.

Rijiju-isa, Opposition benches aija, "nenoki election mekochteter aser nüburtemi nenok dak tamang makar aser nenoki nenok mit adokba ya Parliament nung sadoker. Iba ya shitak masü," ta ashi.

Kasa mapang nung Rajya
Sabha nung House kenir JP
Nadda-i, Opposition lenirtem
den kechi südir süaka sensak
asemsü ta shiogo.

Lok Sabha nunga Congress
 aser tanga Opposition
 züngsemtemi SIR dak sendakba
 nung senksa asemtsü khang
 longkak aitba sülen sensaksem
 anena liasü.

SIR ken o dak alia Opposition party temi tawa Delhi kübok Red Fort anasa bomb pokdaksüba, linük yimtiba nung mopung menenba aser foreign policy ken o tem sensaksemner.

India nung yangluba nuclear submarine 3buba yakta commission asütsü: Navy Chief



New Delhi, Luchii/December 2 (Agencies): Navy Chief Admiral Dinesh K. Tripathi-i Mongolbarnü ashibaagi, India nung yangluba nuclear-powered submarine tasembuba 'Aridaman' yakta commission asütsü.

Navy Day matong tsüingda
osangbenertem den
sensaksema mapang Admiral
Tripathi-i ashiba agi, Project 75
India kübok stealth submarines
trok alizüksü atema inyakyim
tembanga arudar.

Paisa, Navy nem Rafale-M fighter jets 26 agütsütsü alibangung pezü 2028 küm angutsü taashi. India-i April ita item jet temalitsü asoshi France den sem crore 64,000 alang tenangzüktepbka ka yangluogo.

Navy tekolakbaisa,
Operation Sindoor mapang pai
aniba sepaitem shilem indang
lemsatep aser ashiba agi, parnoki
kanga sashia nokdakba ajanga
Pakistan navy rongnendak
anasa dang ata liasü.

Admiral-isa, Pakistan den
mangatettep adokba sülen
Indian Navy Arabian tzüym
nung densema taoba ita tenet

tashi renema dang lir, ta ashi.

Navy tekolakbaisa.
Operation Sindoor ya and
metembangi lir ta ashi.

"Operation Sindoor mapang carrier battle group yokba densema India navy-i kangasashia nokdakba aser kangakara jenjang agiba ajanga Pakistan Navy parnokrongnendak anasa mesura Makran tzüküm anasa dangliasü," ta pai ashi.

Tripathi-i ashiba agi.
 Operation Sindoor ajanga.
 Pakistan rongsenketzung nung.
 akoksaogo, kechiyong.
 shishilembartem rong aikati.
 Pakistan-i maotsü meranger.

Kasa mapang nung
Pakistan-i aotsü atema rongtem
indang insurance-a timba
kümogo, ta pai shisem.

Nuclear-powered submarine
tem indang asungdangba
mapang Navy tekolakba yag
ashiba agi, kidang yangluba
nuclear-powered submarine
tasembuba yakta commission
asüsü lir ta ashi.

INS Aridaman ya tang
tendangdar aser yakta
commission asütsü, ta pai ashi.

atema India anung ajanga aotsü asoshi Pakistan-i mepeshiba India-i temelaba agüja liasü.

Sri Lanka nem teyari agütsütsü atema India adena aotsü asoshi Hombarnü Pakistan nem temelaba agütsüogo. Pakistan-i iba temepeshiba ya Hombarnü 1300 hours (Indian time) shi nung agütsü, ta ken o jangja alirtemi metetdaksü.

Iba temepeshiba ya Sri Lanka nem teyari agütsütsü atema asünung India-i takarariba nung jenjang agia Pakistan nem temelaba ya Hombarnü 1730 hours (Indian time) nung agüja liasü.

Pakistan-ibo parnok anung amshitsü asoshi India nem temelaba agüja mali, saka parnok nem iba temelaba agütsüba ya teyari agütsütsü aliba ajanga dang lir. India-i ghonda pezü tsüngda telemetba agir temelaba agüja liasü.

Ajisüaka pakistan nung media balalai osang teyazü proktsü meranga India-i Sri Lanka nem teyari bener otsütsü atema linük adena aotsü asoshi temeleta magütsü ta shia liasü.

Kasa mapang nung Sri Lanka nem teyari agütsütsü asoshi India-i Operation Sagar Bandhu benoka liasü. Operation Sagar Bandhu kübok India-i Sri Lanka nem relief oset ton 53 agütsüogo aser India nunger 2000 dak tema anir aruogo.

Sri Lanka Air Force den longjemer India Navy indang aircraft carrier INS Vikrant nungi Chetak helicopters aser IAF indang MI-17 helicopter temi tekümzükbä maparen balala nung teyari agütsüba den taolen makai alirtem, mashisa alirtem, kinü tanurtem aser kanga mejungi yirur alirtem anina liasü.

India-isa, süki, tarpaulins, tabentsü sü, hygiene kits, terenem chiyongtsütem aser surgical equipment, BHISHM cubes ana den medical team nung nisung pongu, National Disaster Response Force (NDRF) nungi special Urban Search and Rescue (USAR) team nung nisung 80 IAF tayimtsü asem nung yokogo.

पंजाब नैशनल बैंक
punjab national bank
(A Govt of India Undertaking)

ASSET RECOVERY MANAGEMENT BRANCH (ARMB) GUWAHATI (823100)
1st Floor, Zonal Office, Hem Baruah Road, Panbazar, Guwahati 781001 (Assam), cs8231@pnb.bank.in

Ref No. ARMB/GUWAHATI/E-Auction/sale-notice/09/2025 Date: 28.11.2025

E-AUCTION SALE NOTICE FOR SALE OF MOVABLE / IMMOVABLE PROPERTIES

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 proviso to Rule 8 (6) kübok Movable /Immovable Assets tem ayoktsü atema E-Auction Sale Notice agütsür. Iba osang ya nüburtem aser talisa Borrower(s) / Partner(s) / Proprietor(s) / Mortgageors(s) aser Guarantor(s) tem dang teküboklen agüja aliba immovable/movable property/assets mortgaged/charged to the Secured Creditor, the constructive/physical/ symbolic possession ya borrower (s) and guarantor (s) temi apua aliba sen meypa agitsü atema kodang koma yokner ayoktsü atema Bank/ Secured Creditor indang Authorised Officer-i agiogo. Jenjang aser earnest money deposit ya teküboklen table nung shisema aliba ama asütsü.

SCHEDULE OF THE SECURED ASSETS

Lot No.	Name of the Branch	Description of the Immovable Properties Mortgaged/ Owner's Name (mortgagors of property(ies)	A) Dt. of Demand Notice u/s 13(2) of SARFAESI ACT 2002	A) Reserve Price (Rs. in Lacs)	Date/ Time of E-Auction	Details of the encumbrances known to the secured creditors
	Name of the Account		B) Outstanding Amount	B) EMD (last date of deposit of EMD)		
	Name & addresses of the Borrower/Guarantor Account		C) Possession Date u/s 13(4) of SARFESI ACT 2002	C) Bid Increase Amount)		
1	Dimapur (045120) M/s Delight Furniture Mr. Joseph Mero (Prop: Delight Furniture, S/o Late Wezhitsü Mero, House No. 288, Naharbari, Dimapur, Nagaland 797112 (Borrower) Shri Wezhitsü Mero (Guarantor and mortgagor), since deceased i) through legal heir: Mr. Joseph Mero, S/o Late Wezhitsü Mero, House No. 288, Naharbari, Dimapur, Nagaland 797112. ii) any other unknown legal heirs	All the part and parcel of Landed property measuring 01B-03K-10L in the name of Wezhitsü Mero, S/o Late Kewechu Mero under Dag No. 55, Patta No. 21 under Naharbari Village Mouza No. 3 at Dimapur Nagaland which is butted and bounded on the North : by approach road of Smt Alila Ao, on the South: By the land of Mr. Ranjit Meech and Wati Ao, on the East by land of T C K Lotha, on the West: by Naharbari Road.	A) 23.04.2018 B) Rs. 41,85,172/- as on 22.04.2018 plus further interest w.e.f. 01.07.2018 and other charges C) 20.10.2018 D) Symbolic Possession	A) Rs. 120.89 Lakhs B) Rs. 12.08 Lakhs (10.01.2026 up to 4 P.M) C) Rs. 0.50 Lakhs	Date: 12.01.2026 Time: From 11:00 AM to 04:00 PM	Not Known to Bank

E-AUCTION SALE indang TERMS AND CONDITIONS:

- Ali kimong aser kiojen ya koda koma yokner aser kichisa lir ajak ayoktsüba yimya nung yokatsüyatsü.
- Ali kimong aser kiojen kobasa agi ali iba indang onsang Authorised Officer-i takokba tashi tejangjaba nung agütsütsü merangogo, saka aibelen mesüra zütokba kar danga lira aji Authorised Officer khuret masütsü.
- Yokyatsüya ya tashi agüja aliba ketdangsüri Website <https://www.baanknet.com> nung agüja aliba e-auction platform ajanga 12-01-2026 nü Lot No. 1 atema 11:00 AM nungi 04:00 PM tashi nung inyaksangshitsü.
- Yokyatsü term aser conditions tejangja asoshi <https://www.baanknet.com> semdangang.
- Tayoktsü aliba Ali kimong aser kiojen (E-auction) dak sendakba nung bank-i memetetba sorkar mesüra tanga kar nem danga tagütsütsü kar danga lira aji tashi agüja aliba ketdangsür mesüra bank khuret masütsü. Bidder asütsü bilemertem dang statutory liabilities, arrears of property tax, electricity dues ama densema Ali kimong aser kiojen dak sendakba nung peisasa ken o bushisüngdangtsü ajungshir.
- Bid tem agizüksü magizüksüji tashi agüja aliba ketdangsür melung. Temulung mesüra mesüra mapang thinentüsü/ thitsütsü/ torn nung thitsütsü mesüra auction indang terms tema kuli kecha magütsü thitsütsü asoshi tashi agüja aliba ketdangsür mulung aser pai telemeteba agibaji tatembang asütsü.
- Bid mebenok tsüngda bidders temi ali kimong aser kiojentem asadangtsüla. Bidder temi osang agüja aliba dak ajemdaker dealing official den tontgepratepa ali kimong aser kiojentem asadangtettsü.

Date: 28.11.2025
Place: Guwahati

Authorised Officer
Punjab National Bank, Secured creditor



TIR YIMYIM YIMOBILEM (EDITRIAL)

DIMAPUR WEDNESDAY, DECEMBER (LUCHII) 03, 2025

HIV/AIDS atema Arogo teinyaktsü lir

- P Tiamongba Aier

December 1, 2025 nü World AIDS Day amungdang Nagaland nung taintem dak Human Immunodeficiency Virus (HIV) menatepba 1.37% lir ta taoksatsü osang ka sangoktsüogo. Iba dak alia HIV ya High Risk Groups (HRGs) dangi nungibo "At Risk" nisungtemi ang teimba menar ta bushitetba osang ka lemsatepogo. Iba ya India HIV Estimates 2023 ajanga bushitetba osang lir saka parnoki asadangba nungji Nagaland nung nisung aika medensem alitsü aser shibai metet parnoki bushitetba dang nungi HIV aketer teimba alitsü südi. HIV ya PWIDS (people who inject drugs), FSWs (female sex workers), MSMs (men having sex with men), TGs (transgenders), prison inmates, migrants amala High Risk Groups (HRGs) tsungda kanga menateper saka Nagaland nungbo "at-risk population" dak tali puteter ta shiogo anungji "at-risk" purtem taküm azüoka alitsü osang sangoktsütsü kanga tongtipang kümogo. Alima nung meimchir dak atongba tashidak tulu aika lir saka item tashidaktem rongnung Acquired Immune Deficiency Syndrome (AIDS) ya ka lir. Tang tashi nung AIDS atema taneptsü mozü kecha nguteta mali aser kümshia iba tashidak ajanga nisung aika taküm samar. AIDS ya Human Immunodeficiency Virus (HIV) ajanga adoker aser mapang shitak nung puteta anepalu mesüra iba tashidak agi menepertem anojungi arishi sükdoker. Anungji Nagaland nung World AIDS Day 2025 amungdang sangoktsüba osang ya ajak asoshi tansütsü ka ama züngshitsüla aser iba nung sorkar dang masü saka Arogo teinyaktsü-a tulu ka lir ama angateter. Kechiyong asenok Khristan tamangertemi taküm asüngteta alitsü aser kibong akümba sülen ang apuani na shi nung medema soyapokya aotsü Laishiba tesayuba lir. Nisung ajaki asüngteta malir ta mashir kechiyong nisung aika lanur asüdang Tsüngrem o dak rangloker aser tashi angaa asüngteta alir. Ajisüaka ano aikati lanuwa asüdang asüngteta meliteter aser idangji temenen menaba dang masü saka memeteti HIV menar taküm amajok küma aoba asenok tenük agi ngua arur. Iba dak alia drugs amala temesepba achiajemtsü amshirtem tsungda HIV menateper aser parnok ajanga tangar dak-a menazükdaktsür. Anungji Khristan taküm ka, Khristan tamanger ka Laishiba tesayuba sülen libaliroa aotsü tesayuba aser tangatetbaji Arogoi agütsütsü tim. Sorkari kodaser HIV menatepa aoba azüoktsü ta asüba mapatem inyaker aser HIV keta alirtem nem mozü agüja anepalur. Ibaji par teinyaktsü saka nisung ka talisa Nagaland nung Naga nunger tamangertem tim lenmang nung anitettsü aser alima jabujari balala nungi jenbua lidaktsütsüba tesayubajibo Arogo tebilemstü khuret aser teinyaktsü lir. Tenla ki pulpit nungi item lokti temenentem atema Laishibai kechi ashir, Tsüngremi kechi ashir, kechi inyaker ta asüba tesayubatem ajangajanga nütsüngtem nem angatetdaktsütsüla. "At Risk" aser taintem dak ang HIV teimba puteter ta asübaji reprangdangra "At Risk" ta ajartem rongnungji lanur aser tainlonglong purtem dena lir, anungji Arogoi tanurtem, lanurtem koba tashi aniteter ta asüba meyipa reprangtsü kanga nüngdaka kümogo. Külen, taintem (adult) pur danga Arogoi koba tashi Khristan tajung kaka ama alitsü tesayuba agütsür, ajia khen meyipa reprangshitsü mapang tongja tongogo. Osang tajung kaji National AIDS Control Organisation (NACO) indang national performance rankings nung Nagaland jenjang 19 buba aliba nungi 8 buba tongogo aser iba ya HIV anema raraba nung takok ngua inyakteta aruba kuli ka lir. Ajisüaka, "At Risk" aser taintemi libaliro shitak melii HIV menatepba ya mazüoktetra Nagaland nung HIV aketer tali züina akümtsü aser kinü tanurtem dak-a HIV keter sotepba tensa tamajung ajurutsü ana nung dang lir.

OLEMSABANG

AROGO NUNG MEPUTEP, TARISHITEP ASER TELEMSA MALITSÜLA

~ L. Kika Pongener.

(Yashi adok nungi...)

Tanü asen lima nung arogo aika shirangba tashitak tamajungtibaji....Arogo nung tenzükertemi rongsen ketdangsuba nung ochimashi amshiba. Toklang tenzükertemi ajemalua tila kümer tenzüktsü melena; arogo tsüzüng-ozüng/inakyim tazüokba küpok melinui pei sunutsü sua dang tenzükba. Arogopurtemi tenzükertem mapa nung tai apotsü kishia bushiba; iba amala tashitak agi arogo aika shiranger. Kangasa tesasatsüka, tenzükertema suang; arogopurtema suang; karbo pa/la dang ajungba kecha maka; oda maparen ajak nung mulung masüba agi sunger; tamajung/tashimait dang ajitetba karbo lir. Ano kangasa tesasatsüka; karbo kipoksem ajak nung arogo inyakyim agi mulung masüba indang nungsen dang jembia jajaba; iba amala jagi arogo shirangdaktsür. Ano karbo nisung dak metsüdaker tamang nung atsüngzüka oa alitsü akok. Asenok ya nisung dak amanger masü; Tsüngrem dak amanger....Kechiba nisung o nisung na nijaren nung arishitepba agi Khristar arogo timtemdaktsütsü (?) Toklang tenzükertema arogo inyakyim nung ne mulong masüba agi; pei mapa nung tezü danga tamakok aludakja ali asü (?) Tsüngrem sentong dang nungibo asen taginuba/asen nukjidong ataloktsübaji tongtipangba sudaktsür asü (?) Tsüngrem mulong chidakja tenzüktsüba dang nungibo asen tajangzük angutsüba-ang tongtipangba sudaktsür asü...???

Tenzüker ajaki arogo nung tenzükba ya; nisung peladaktsütsü atema tenzüker masü; saka Tsüngrem mulong chidaktsütsü tenzüker ta angateta tenzüktsüla. Tsüngrem o-i ashir, "Kechiyong ni nisung temulong chidaktsütsü bushir asü ? Mesura Tsüngrem peladaktsütsü bushir ? Ni nisung peladaktsütsü meranger asü ? Ni nisung peladaktsüra ni Khrista lar masü" (Galati-1:10). "Nenoki kechisa inyakdir aji nisung dang masü, saka Kibuba dang temulong ajak agi inyang. Kechiyong nenoki Kibuba Khristaji tenzüker" (Kolosi-3:24-25). Arogo nung tenzükba ya asenok pei ajangzüktsü atema tenzüker masü; saka Tsüngrem mulong chidaktsütsü atema tenzüker ta angateta tenzüktsüla. Tsüngrem o-i ashir...."Shingaia kibur ana metenzüktet"...."Nenoki Tsüngrem aser rongsen metenzüktet" (Mathi-6:24)...."Parnok Tsüngrem pei tepok lir....Aser parnoki alima oset indang bilemer; Saka asen senso kodak nung lir" (Filipi-3:19)...."Parnoki Tsüngrem tsübubaji tajangzük anglulen ta bilemer" (1Timoti-6:5b). Atangji, tenzükba ya asenok pei tajangzük atema tenzüker masü....Anungji anibelem, timtem, touthi, tatalla, sensa-masa, sensak tia aser takoksa jenti liaka; ajakji arema bendanga agutsür tenzüktsüla. Tsüngrem o-i ashir...."Khrista dak amangtsü asoshi dang masü, saka pa atema tim-atemtsü nenok nem agutsü" (Filipi-1:29).

Temeim arogotem nung tenzükertem aser arogopurtem....Küm talangka tenzüka/amanga arur Tsüngrem nungi temoatsü melena; atakadem-ang angutsüsa tenzükttetra aser amangtetra....Kanga tesasatsü-ka asütsü....!!! Kechiba asenok pei ajangzüktsü mechi, mesura nisung kar mechi Tsüngrem tsüngdang aibelena tai menatsü...??? Na aser ni Khristar arogo nung jangjongmarar, petsaperonga, timtem agutsür aser telemsa atokdaktsür ka masütsüla. Tsüngrem o-i ashir..."Iba lung manung shiba tsükdir pa anuka raksatsü; shiba dak ibai tsükdir ibajagi pa anuka menungsatsü" (Mati-21:44). Lungji Yisu Khrista aser arogoji Yisu Khrista temang tenuk-telen lir (Efesa-1:23). Anungji, Yisu Khrista temang tenuk-telen nung timtemdaktsürjibo ashiko, timtem tulu asütsü...."Anuka raksatsü aser menungsatsü".... Anungji na aser ni Khristar arogo nung mepetmesu adoktsür ka masütsü....Saka Khristar arogo tashi-itdaktsür, ajungshir aser shisalen sayur tajung ka-ka asütsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ali temeden agütsüba sülen Catholic nunger lumiba anenogo

Thiruvananthapuram, Luchii/December 02 (Agencies): Kerala nung küm pongu shi jakdang Muslim charitable body kati kibur akumba ali ka temeden khen atema state court kati Catholic nunger nem agütsüshiba sülen anogo 414 buba nung lumia longkak aitba tembangogo.

Kerala State Waqf Board ajanga Kerala kübok Ernakulam district nung aliba Munambam yimtsüung nung ali tuluka parnok indang lir ta sangdongba sülen yangji alir kibong 600 dak temai 2023 nungi longkak aita aru.

Catholic aser Hindu nunger aika dener yimdaklir temi ali ya 1988 aser 1993 tsüngta ozüung agi mela aliba ama alia yangji parnok küm aika lia arur ta ashir.

Mangatettep aliba li nung amenoka aliba Valankanny Matha Church indang putir Father Antony Xavier-i ashiba agi, Kerala High Court kati November 30 nü totuyuba ka agütsüba nung ketdangsürtem dang tang atema yangji alir nungi land tax meshitsü ashiba

sülen longkak aitba anen. "High Court ajanga khen atema ozü revenue temeden tanaben agütsüba mechi onoki lumia longkak aitba anenogo. Ano timtem alinungbo, onoki nungnanga melie longkak aittsü," ta Xavier-i ashi.

Kerala indang Law Minister P. Rajeev aser Revenue Minister K. Rajan nati lumiba anendakja longkak aita aliba lenirtem nem lemon juice agüja state sorkari yimdakliri aginüba nung bhukuma nokdaksü ashi.

Waqf Board ajanga iba ali ya par indang ta sangdongba ajanga January 2022 nungi Revenue Department-i land tax meshia aliba anenba sülen mangatettep tali akum.

Iba board yagi iba yimtsüung nung ali jectares 163 (404 acres) shi waqf indang aser teyari atema angati sempet agütsüba lir ta ashi, koba Islamic Sharia ozüung kübok tarutsü nung sempert magütsütsü, senmang ama mamangtettssü, meyoktettssü mesüra mesamadaksütsü teti atema bendanga agütsüba lir.

Yimdaklir temi iba ali

alidang kodanga waqf meyong ta shia meliasü aser iba nüngja ya 2008 küm sorkari shimba committee kati ang agütsü ta ashir.

Kerala High Court indang division bench kati October ita Waqf Board-i kibur akumba agienja yimdaklir kibur lir ta ashi. Tesüsa November 26 nü Justice C. Jayachandran-i obendang agütsüba nung 'final petitions' taten kati maruteti aliba mapang Revenue Department dang iba telemtetba nung anidaksü tuyu.

Kerala Waqf Protection Forum ajanga India indang Supreme Court dang ona lem p ya Waqf Tribunal ket nung lir asünung High Court kübok masü ta ashi. Waqf Tribunal ya iba ama mangatettep bentettssü asoshi tashi agüja aliba tentet ka lir.

Longkak aitba tulubabo anenogo saka Hindu nationalist Bharatiya Janata Party den sendaktepa aliba yimdaklir telok tila kati kibur temeden ya teti asoshi magütsü tashi maneni longkak aittsü ta ano longkak aitba tasen ka tenzüka lir.

High Court-i tamangba yimsü balala indang leper kumzüka ayutsü tuyu

Mumbai, Luchii/December 02 (Agencies): Maharashtra indang High Court ajanga municipal ketdangsür dang tamangba yimsü balala indang leper asoshi wazüka yutsüba ali acre toku ozüung alema agiba mürektettssü totuyuba agütsü aser parnoki taoba mapang totuyuba agüja aliba mapa kuma meinyakba asoshi ketdangsürtem aija liasü.

Iba ali wazüka ayutsü January 8 nü totuyuba agütsüba ama Thane Municipal Council (TMC) yagi meinyak ta ngutetba sülen state indang tematiba court yagi November 28 nü obendang nung TMC dang hopta asem tsüngta mapa kuma inyakba report agütsütsü totuyuba agütsü.

Iba ken o ya ano January 9, 2026 nü angadangtsü.

Mumbai tezülen Thane nung Bhayandarpada nung ali ya Khristan, Hindu, Muslim, Lingayats aser Jews nunger atema leper asütsü ta 2016 küm lazükja liasü.

Iba ali ya yamaji latetja liaka, ketdangsür temi tasü mang aremstü mesüra arongtsü atema anepalu mesüi mamshitettsüsa yutsü, ta Mumbai nung amenoka aliba Association of Concerned Christian tongti zülur aser ken o benoker Melwyn Fernandes-i ashi.

Iba totuyuba yagi Khristanpur nem kanga nüngdaka aliba anisüngzük agütsür, shirnok tasü mang aremstü atema meta kilometer 30 tashi jajar, ta pai ashi.

Maharashtra Transport Minister Pratap Sarnaik den

sendaktepa aliba land developer company kati iba ali ya kisü-jensüba oset aser gari anena ayuba nung amshir ta Fernandes-i court nung tai tonglokja nüburtem ali nung yimten yimsüsür aser shishilempar teka aitba sayua liasü.

Fernandes tenüung nung Catholic lawyer Sunita Banis-i court dang TMC yagi ali ya atsübanga meyutet aser court nungi totuyuba liaka temelaba magütsüba mapa inyakdaksü ta ashi.

Court-i TMC dang ali agiba ajunga agentsü, temelaba makai amshiba anentsü aser ali kimong ajunga müketa atsü atsütsü totuyuba agütsü.

Court-isa iba civic body dang data tejangja, tasü mang aremstü nüngdakba atema scientific projections, wazüka aliba leper ajunga yanglutsü atema mapang telatet densema affidavit tasen ka agütsütsü tuyu.

Fernandes-i 2021 küm public interest litigation benokba nung Thane district nung aliba Khristanpur tasü mang aremstü atema sorkari Bhayandarpada ali agüjaka leper mali kanga tim atemer ta shia liasü.

TMC yagi 2019 küm iba ali renemstü atema Minister Sarnaik den sendaktepa aliba private developer ka hire asü, ta petition ajanga ashi. Ajisüaka firm yagi iba ali anasa commercial housing project ka tenzüka wazüka aliba ali ya agi. Maharashtra nütsüung yongsük 132 million nungi Khristanpur shilem ka shi dang

lir, aser Thane nung ali jenjang tali akumba ajanga leper indang ali tem mela-mela rakzüker ta activists temi ashir.

2024 küm Thane district nungsa Kalwa nung Khristanpur leper nung aliba chapel ka nung mejangjaba nisung kari mi senloksü, aser police nem ken o agüjaka kecha mashi yutsü.

Pope-i Muslim, Khristan lenirtem den telungjem indang jemb



Pope Leo XIV-i Lebanon yimtiba, Beirut semdangba mapang tangokba noksa ka yangi angur.

Beirut, Luchii/December 02 (Agencies): Middle East nung timtem liaka telungjem, teka amteper inyakba, akang-jungshitepba aser tesunep takoktsü lir, ta Pope Leo XIV-i ashi.

Hombarnü central Beirut nung tamangba yimsü balala nungi lenir 300 dak tema adenshia alidak pai iba o ya ashi, kong Lebanon nung Khristan lenirtem, Islamic sects temia o jemb

ANO GO ABEN TSÜNGREM DEN

Sarasademang, ataang mesüra mapa ~ T.Ken 94:11-23

"Tamajung inyakeretm anema ni asoshi shibai noktaksü? Temenen inyaker anema ni asoshi shibai noktaksü?" (t.16). Iba tasü ngdangba nung kechi koma telangzüba ka agütsütsü ni memetet.

Tebilemstütem asoshi asenoki sarasadem dang asütsü mapang ka lir. Asenoki ataa alitsüba mapang ka lir. Tsüngremi "tangbo masü- ni tesülen ibai reprangtsü" ta ashitsüba mapang ka lir. Saka asenoki inyaktsüba mapang ka lir. Mosa noktaka atar nüburtem Ejip nungi adokdaksüba, mesüra Dawidi Tsüngrem O bendangba mapa inyakdang ama.

Asenok alima tesangwa ama noktaker sangwadaksütsüba mapang ka lir, asenok alima metsü ama alima raksaa aodang aji kümzüksü amshitsü mapang ka lir.

Terepranger ka ama, "Junger, ni iba atema sarasademtsü" ta ashitsü koda temüla! Junger, yamaji inyakang. Saka Tsüngremi ashir, "Ni atema tamajung inyaker anema shiba noktaksü?" Telangzüba: Shirnoki Tsüngrem parnok Teyarir ta meteta lir parnoki noktaksü. "Kibubai ni meyarilasang Kü nela sür lila" (t.17). "Saka Kibuba kü mitsa aser kü Tsüngrem, kü lung, shiba dak ni jenoker" (t.22). Kodang Tsüngrem ne teyarir lidir, kodang Tsüngrem O nung aruba Tsüngrem tashi na katir, nai iba lima temenen anema noktaktettssü.

Shirnok temenen nungi pilaa lir mapa inyaktsü ajar. "Temenen chuba menden, kobai temenen ozüung kümdaksür, ibaji ne den telungjem lidima?" (t.20). Tanü asenok temenen aika nungi kümzüksü ozüung kar.

Aji saka shirnok temenen nungi pilaa lir, parnoki tamajungba anema Tsüngrem den noktaksüla- Pai tatem nung takok agütsütsü ta amangertem. Asenoki rara karbo makoktsüsa akok, saka Tsüngrem tenüung sangang asenoki raraji akoktsü!

Tamajung inyakeretm den Khristantemi pelaa malitsüla. Asenoki parnok den sarasadema, ataa aser mapa agi inyaktsüla. Tsüngremi na Pa asoshi tawabangba ka südaktsüner. Pai na kong yutsür idakji taküm aliba kuli ka süa liang. Kodang nai sarasadem, ataa alir mesüra shilem agir, Pa leniba asü ngdangang.

aser yimjung ya takoktsü ta sayur," ta pai ashi.

Syriac Catholic Patriarch, Ignatius Joseph III Younan-i sentong tenzüka pela agizükba o jemb

aser iba sülen Byzantine rite nung Gospel recitation ka agi aser Islam yimsü nung temeshi kaket, Quran nungi azüung.

Khristan putir temi o jembiba sülen Lebanon indang Grand Mufti Sheikh Abdul Latif Derian-i pope ya pela agizüka liasü.

"Onoki nok-nü bener jajatsü mejangrar, aser onoki Lebanon taginüba nü kabu nung yutsür, ozü linük tekumtet anguba nung alimai yaritsü imlar," ta Higher Islamic Shia Council indang deputy head Sheikh Ali al-Khatib-i ashi.

Sentong metenzük dang nisungtem Beirut north tsütsü Apostolic Nunciature nungi yimti tiyong nung Martyrs' Square tashi lenmang nung adenshia Pope Leo agizüka liasü.

Anogo asem asoshi Pope Leo ya Türkiye nungi Lebanon-i Deobarnü arua liasü.

AO OSHI ANGAZÜKDAK:

TANÜ ANGAZÜKTSÜBA OJANG

Tsükpok

(n) Motong nung tsük jungjunga kümer ano temai madoki aliba mapang (rice bud)

* Tsükpok mapang anü apuba ya junger.

Tsükpong

(n) jendang tsük meraksadaksütsü atema amshiba au pongdang (Bamboo tube use for passage of air to protect rice in huge bamboo basket)

* Jendang tsük anung tulu tiyong nung tsükpong asenoka ayur.



Tir Yimyim

OLONG PAITEP # 7348

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti
- Tsük rudenba
- Temzüng tesashi
- S__ _ i
- Nisung rongnung telemsa
- Anogoshi
- Ajanga aor
- Tsük rüzügdak
- Tebang nungi adokba
- Süngdong tatembangtiba
- Meputep

- (5)
- (5)
- (5)
- (3)
- (3)
- (4)
- (4)
- (3)
- (3)
- (5)
- (5)

LANGTSÜNGLEN

- Tenük telong
 - Committee dang ajar
 - Yagi ki okdoker
 - Yim lenmang
 - Temoatsü keter meyipa aruba
 - Kanga junga menemba
 - Kenyongi majinü
 - Rong kanga tulu
- (9)
 - (5)
 - (7)
 - (5)
 - (9)
 - (7)
 - (5)
 - (5)

OLONG PAITEP # 7347 TELANGZÜBA

TIPIEN :

- Semtu, 3. Lepko, 5. Bilem, 8. Ulu,
10. Tsüngpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

- Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER



Romania nung nüngtugu craftsman Ion Rodos aser par jabaso Gheorghe Rodos nati "World's Longest Carved Wooden Spoon" yanglutetogo. Tenati yangluba spoon ya 17.79 meters (58 ft 4.39 in) talang aser tulutibaji 1.50 meters (4 ft 11 in) lir. Iba spoon nung tenati traditional folk motifs aser Mioveni yimti indang logo chiteta yanglu aser World Record Academy ajanga World's Largest Carved Wooden Spoon kuli agütsüogo.

Tripura BJP-i Tipra Motha aitsür; kuli tejangja meshir

Agartala, December 2, 2025

(Agencies): Tripura nung Bharatiya Janata Party (BJP)-i Tipra Motha Party aitsüogo aser tangar dak tai metongloksüdang tamasa kuli tejangja agütsütsü shiogo.

One North East rally nung Tipra Motha lennirtemi o jembiba ya voter tem anisatsü atema lir ta Tripura BJP lennirtemi ashi.

"Tipra Motha Party-i külen nübortem asoshi constitutional solution ka akhanger aser TTAADC nung atalokba ajak state sorkar dak tongloksür. Külen, parnok lennirtemi ADC areas nung mapa inyaknüba tanga political party tem amokmerener" ta taoba MP aser BJP lennir Rebati Tripura-i ashi.

"TTAADC ya constitutional body ka lir saka parnoki mapang shia regular audits asütsü lateta aliba ama meinyaker. TTAADC madak yimsü asüba

party-i tashishitsü malitsü aser ochishia inyaksü mebilemer. Comptroller and Auditor General-i parnok dangi tim masüba inyakba atema shidi ka zülüogo" ta paisa ashi.

'One North East' ya public anisatsü atema inyakba mapa ka lir. Tanü asüngbo Tipra Motha nungi Greater Tipraland yimyim tu samaogo. State balala nung political party tilala aliba lennir kari dang iba mapa tenzükogo. Talisa Tipra Motha-i tesüiba yimyimtem ajanga voters atsür marutetba agi nübo ayimtsü tasak kümogo ta Rebati Tripura-isa metetdaksü.


"Regional party tentetsüba nükjidong tongtipangbaji national parties noktangsü atema lir ta Minister Animesh Debbarma-i shiogo. Külen, Pradyot Kishore Debbarman-ibo tanga ashir. Iba senden nung parnoki jembiba onüktem meputeper aser onoki iba tasa tamajung nung tenük yoker" ta paisa shisem.

Tipra Motha-i Utpal Debbarma ama tesüiba nung telungpur ka party nung aniokba aitsür ta paisa ashi.

Osangbener senden nung Tripura BJP Vice President Bimal Chakma-i jembidang "125th constitutional amendment Bill agizüksü menuba atema Meghalaya CM Conrad Sangma aitsür" ta ashi.

"Tripura-i 125th Constitutional Amendment Bill nung shidangba onük ajak agizükogo saka Meghalaya-i Sixth Schedule kübok rural level nung elected bodies shimtsüba memulunger. Tripura nung ama masü Meghalaya nungbo Sixth Schedule kübok rural level nung elected bodies mali. Parnoki elected bodies tentetsü magizüker kechiyong iba ajanga non-elected Darbar system melenzüktsü. Ajisüaka Tripura nungbo pai 125th constitutional amendment akhanger" ta Chakma-isa ashi.

Assam nung Rs 83 crore Jamunamukh rail overbridge lapokogo



Guwahati, December 2, 2025

(Agencies): Assam nung December 1, 2025 nü tongtipang railway station tem sendaktepba overbridge tuluka lapokogo.

Iba apu lapokba ajanga senzüsönbongertem yaritsü aser tzümetsüng timtem ajurudang train mesenzütetba khuret ajema akümtsü ta Assam sorkari metetdaksüogo.

Hombarnü Chief Minister Himanta Biswa Sarma-i Jamunamukh nung Rs 83 crore endoka yangluba 951-metre bridge lapoktsü.

Iba apu nung 7.5-metre motorable carriageway ka lir aser Dabaka, Kampur o Jamunamukh railway station tem

tsüingda senzüsönbong tekaraba akümtsü.

"Iba apu ajanga corridor tsüingda connectivity tajungba akümtsü" ta CM Sarma-i ashi.

Chief Minister Sarma-isa apu lapoktsüba den külemi Balijuri Tea Estate nung Model High School ka aser tanga tea estates nung community halls aser skill centres lapokja liasü.

Paisa Barhampur aser Jamunamukh Higher Secondary School tem yanglushitsüba den Nagaon Water Resources Division kübok lenmang aser flood-protection yanglutsü atema lungtem azüingsüogo.

"Kümshia Kopili river ajanga Kampur aser Jamunamukh

amala tesemtem nung timtem ajurur. Iba jagi tzüküimtem nung tzünoktangtem akangshitsü aser tzümetsüng timtem ajemtsü atema Rs 80 crore shi endoka water-resource projects inyaksü" ta Sarma-i ashi.

"Tesüiba sorkartem alidang terenlok kangabo maliasü aser nübortem dangi welfare schemes matong. Ajisüaka tangbo Orunodoi, Mukhyamantrir Mahila Udyomita Abhiyan, Nijut Moina aser Ayushman Bharat amala den subsidised rations ajanga sensakertem aser middle-income kibongtem nem anisüngzük agütsür" ta CM Sarma-isa ashi.

Manipur sorkari IDPs yaritsü atema luden tasentem tentet

Imphal, December 2, 2025

(Agencies): Manipur sorkari Hombarnü Internally Displaced Persons (IDPs) pur nem talidak agütsütsü atema State-level aser District-level Committees tentetogo.

Sorkari tensa süngjemdaksütsü aser timtem ajuruba kibongtem yaritsü tenangzükba ama iba mapa inyaker ta sorkar sangdong ka nung ashi.

December 2025 tashi nung arrtsülen aliba IDPs pur nem talidak magütsüra Coordinating Committee on Manipur Integrity (COCOMI) aser IDPs ajanga lungkak aittsü ta sangdongba sülen Manipur sorkari iba lemtet agiogo.

State-level Committee nung Chief Secretary menden asütsü aser pa den Finance, Home, aser Rural Development and Panchayati Raj Commissioner temi yariteptsü. Iba luden nung Special mesüra Additional Secretary (Home)-i Convenor inyaksü ta sorkari metetdaksü.

Iba luden ajanga lemtet agitsü, inter-departmental coordination tajungba lidaksütsü aser rehabilitation o resettlement maparen inyaksü atema onüktem benoka angadangtsü mapatem lemozüktsüogo.

Külen, District-level Committee tem nung pei pei Deputy Commissioner tem menden asütsü. Iba luden nung

Project Director (DRDA), Zilla Parishad nung Chief Executive Officer, aser bangdak Sub-Divisional Officers adentsü aser Additional Deputy Commissioner-i Convenor inyaksü.

Iba luden ajanga field-level coordination, rehabilitation measures inyaksü aser mapang shitak nung State level nem osang agütsütsü.

2023 küm tatemlen report ka nung kin o kin tsüingda rara ajanga nisung 60,000 tema pei talidak toktsür aoba shia lir. Iba sülen July 2025 tashi nung pei talidak toktsür aoer nisung 62,000 nungi parnok 5,000 shi meyipa ogo aser tang 62,000 shi lir ta sorkar ashi.

Russia-i Ukraine anüdoklen Pokrovsk yimti atsüngogo

Moscow, Luchii/December 2 (Agencies): Russia nunger sepaitemi ashiba agi, parnoki Ukraine anüdoklen Pokrovsk yimti atsüngogo, koba logistics hub ka lir aser küm anashi sabanga yur liasü.

Kremlin-i, Russia indang Chief of Staff Valery Gerasimov-i agütsüba iba osang ya Hombarnü Telegram ajanga metetdakja liasü. Kasa sangdong ajangasa Russia nunger sepaitemi Kharkiv kübok Ukraine anüdoklen Vovchansk yimti atsüngba metetdaksüogo.

Kremlin otongdar Dmitry Peskov-i ashiba agi, Gerasimov-i item tesemtem

atsüngba osang Russia Tir Vladimir Putin nem Deobar aonung menor metetdaksüogo, ta Russia indang TASS news agency-i metetdaksü.

Pokrovsk ya Donetsk tesem nung transportation hub tongtibang ka lir, aser Ukraine anüdoklen Russia-i parnoki atsüngogo ta ashiba tesem pezü rongnung ka lir.

Iba yimti nung nisung 60,000 liasü aser hopta ishika tsüngda Russia-i drone, artillery aser bomb tem amshia kanga sashia amakba sülen ki aika ajasaago.

Iba yimti atsüngba indang Ukraine-i osang agüja mali, saka Reuters-i ashiba agi,

Russia nunger sepaitem linük wako bener Pokrovsk yimtung süia aoba video Moscow-i prokshidar.

Iba sülen mapang tatsüka lir Putin-i iba takok asoshi Russia nunger sepaitem nem tenüngsang agüja liasü, ta TASS news agency-i ashi.

Kasa mapang nung Ukraine tir Volodymyr Zelenskyy iba hopta US aser Europe nungi lenirtem den ajurutepa rara tembangdaksütsü asoshi sensaksemdar.

Pai ashiba agi, onük tongtibang kaji Russia-i Ukraine anüdoklen tesem balala atsünger aliba ya magütsütsü asoshi lir.

Imran Khan tenu Uzma Khanum-i pa semdangtsü melar

Islamabad, Luchii/December 02 (Agencies): Pakistan sorkari taoba ato kilonser Imran Khan tenu Dr Uzma Khanum dang teti den tepuokdak ajuruteptsü melar, ta osang ka ajanga ashi.

Pakistan sorkar osangtem ajanga ashiba agi, Uzma Khanum nem temelaba agütsüba ya la medical doctor asüba yong lir. Imran Khan tepuokdak kanga miimshia ayuba mechi linük balalai temulung agüja aser Pakistan linük security tebilemtsü tali akumba mapang iba osang ya angashir.

Rawalpindi nung aliba Adiala Jail nung Khan yua aliba asoshi kinük ajungalen nungi temulung agütsüba, meimchir temeden asüngdangyaba aser alimai temulung agütsüba atema ketdangsür temi temulung nung züngoka lir ta osangtem ajanga ashi.

India nunger itdangiter osangtem ajanga ashiba agi, Islamabad-i "selective humanitarian gesture" sayutsü meranger, talisa parliament nung telemtetba ka agitsü imlaa aliba matongdang iba mera ya aginer. Imran Khan ya azüngmeyaka yutsür, junga

anepalu masür aser kinunger adianutem den majurudaksür ta tai tonglokja Khan'er kinunger aser par legal teams temi ola adoka arur.

Security mechi pa teyi aser tenu nunger nem pa ajurutsü temelaba magütsütsü akok, ta itdangiter osangtemi ashir. Dr Uzma Khan nem tepuokdak tesemi aitsü melara, iba ajurutepta ya mapang tatsüka atema asütsü, kanga sashia mittsü aser phone amala khenyongi memelatsü, ta parnoki ashir.

Taoba ato kilonser indang temang aser tekolok jenjang yimjak nung tang sangdongtsü tebilemba mali ta ashir. Pa teyi aser tenu nunger ajunga nem pa ajurutsü temelaba agütsüra, pa temang jenjang indang temai adoktsüba ajanga yimti-yimdong nung nüburtemi telangzüba agütsütsü akok, ta ashi.

Imran Khan ya tepuokdak telung nung merenshia amshir aser azüngmeyaka yutsür ta tai tongloktsüba mechi nüburtem jashitepta tali akumba tetsübo nung Pakistan sorkari iba mera ya agir, ta itdangiter osangtemi ashir. Nüburtem jashiba ya tali kuma yimtenren nunga

kongshitsü aser tongtipang region, talisa Punjab aser Khyber Pakhtunkhwa (KP) nung tensa tamajungba akumtsü südi ta ketdangsürtem shisabolur.

Ano pa teyi Aleema Khan-ia Pakistan sorkari lar kibong aser Pakistan Tehreek-e-Insaf (PTI) party anema jelia sentong tamajung yanglua inyaker ta tai tongloktsür anogo ka lir iba ya angashir.

Khans aser PTI ola madokdaksütsü atema ketdangsür temi sorkar indang institutions tem nok-nü ama amshir aser rongsenketzüng nunga talenba yoker, ta Aleema-i tai tongloktsü.

Obendang, totuyuba, osang mesüra inyakyim shidak kecha meinyaki la indang bank accounts tem shibangtsüogo, ta lai ashi.

Item mera ya PTI lenirtem marakzüi alena ayutsü nükjidong nung agiba shilem ka lir, ta Aleema Khan-i ashi.

Lai Adiala Jail kima mener longkak aita aliba police temi taoba ato kilonser den ajurutepdaksütsü ta nangzüka sülen iba longkak aita anenba sülen iba tai ya tonglokja liasü.



Operation Sagar Bandhu mapang Rescue workers aser National Disaster Response Force (NDRF) personnel tem noksa nung agur, koba Badulla, Sri Lanka nung Ditwah cyclone aruba sülen India nungi teyari agütsüba maparen ka lir. Sri Lanka nung Ditwah cyclone ajanga nisung 410 asüba jangjaago aser nisung 336 samar bushiba mapang lir.



CLARK THEOLOGICAL COLLEGE

Aolijen, Mokokchung, Nagaland

December 3, 2025

TENÜNGSANG AGÜTSÜR

Senate of Serampore College (University) Convocation, November 27, 2025, Serampore, West Bengal, nung alidang, **Kongro Sashikümla** (Waromong), M. Th., (Counselling), lai takok tulu ngua Senate Senpet ana tashi ngutetba asoshi Clark Theological College-i kanga pelaba lemsateper aser tenüngsang tulu agütsür. "Lanlia, kanga junger!" ta iba osang kaket ajanga sangdonger. Lai anguba senpet anaji yamai lir:

1. Late Dr. C. Devasahayam Prize for Christian Ministry (M.Th.)
2. C. S. I. Diocese of Madras Prize in Christian Ministry (M.Th.)

Tsüngrem Yimli aser Pa sentsüwangshi asoshi lai merangdangba ajak nung Tsüngremi teti moajangma.

Sdl-

Prof. Rev. Dr. A. Temjen Jamir
Principal, CTC



Taliban-i arrtsü nung teka amteper inyaksü Tajikistan dang nangzüc



Kabul, Luchii/Dcember 2

(Agencies): Taoba hopta Afghanistan nung amendaker ozüing alema inyaksangshirtemi Tajikistan nung China nunger pongu tepsetba sülen Afghanistan' indang Taliban administration-i Mongolbarnü kidanger Tajikistan dang arrtsü nung security akangshitsü aser longjemer ken o bushisüngdangtsü atema parnok renema aliba metetdaksüogo.

Tajikistan Foreign Minister den sensaksemba mapang Afghan Foreign Minister Amir Khan Muttaqi-i, iba lendong atalokba atema sasa bilemba lemsatepta den arrtsü nung linük ana sepa tesendaktep akangshitsü asoshi Kabul renema aliba lemsatepta den ozüing alema inyaksangshirtem anema longjemer jenjang aitsüji tang kanga nüngdaka kümogo, ta shisem.

"Arrtsü nung security akangshitsü, longjemer bushisüngdangtsü aser lenla ajak nung tesendaktep ayutsü Islamic Emirate renema lir," ta Muttaqi-i ashiba the Afghan foreign ministry sangdong ka ajanga metetdaksü.

Paisa, linük ana tsüngda tawa kati ka dak tamang katepa arudar aser iba ya takok tashi meraksadaksütsü merangtsüla, ta ashi.

Tajikistan nunger ketdangsürtemi Hombarnü ashiba agi, drone agi grenade

tsükdaksüba densema tesem ana amakba mapang ano China nunger mapa inyaker pongu yirutsüogo.

China indang embassy-i nisung asüba osang jangjashitsüogo aser China nungertem dang arrtsü nungi pila alitsü tetuyuba agütsüogo.

Tajik tir Emomali Rahmon-i iba lendong atalokba sülen arrtsü nung security akangshitsü tetuyuba agütsüogo, koba kinük nung aliba tesemtem nung ataloka liasü.

China ya Tajikistan nung sen aika entoka mapa inyaktertem ronngung ka lir. Tajikistan nung nütsüngyongsük million 11 shi lir aser parnok ya Russia den kanga junga sendaktepa aliba linük ka lir.

Afghanistan tang anüdoklen Pakistan den arrtsü nung mangatettep adoker tesendaktep kanga mejungi kümer lir. Linük ana yagi kati ka dak tai tongloktsütepa arudar. Pakistan-i Afghanistan nung amedaker aliba kiralongrartemi linük kübok tesem balala amakba atema Afghanistan aitsüdar aser parnok dang item kiralongrartem ya azüoktsü takhangba agüj arudar.

Taoba ita tashi nung linük ana arrtsü nung khatapogo aser Istanbul nung yimjung atema sensak asem saka takok mongutet. Ajisüaka linük ana tsüngda ceasefire bo benoker lir.

Sports Minister-i Indian Football Stakeholder tem den ajuruteptsü



Luchii/Dcember 2, 2025

(Agencies): Sports Minister Mansukh Mandaviya-i linük nung football asaya achaayangba national federation aser taoba mapang commercial partner aser club tem aser Indian football nung stakeholder ajak den December 3 nü ajuruteptsü.

Indian football nung tang mepetmesü adoker aliba bentettsü merangtsü asoshi iba senden ayonger.

All India Football Federation (AIFF)-i top-tier Indian Super League densema domestic league tem ayongzüka asayatsü asoshi commercial partner tasen ka mongutetba sülen iba mepetmesü ya adoka liasü.

"Supreme Court-i ken o bentettsü atema ministry-i jenjang agitsü tetuyuba agütsüogo aser iba tetuyuba dak ajemdaker jenjang agir. Indian

football representative tem den anogo tepeyong senden amentsü. Parnoki tebilemtsütem lemsateptettsü aser ministry-i takok tashi shisatsü agütsü merangtsü," ta ministry source kati PTI dang ashi.

ISL ayonga asayaba lokti tentet, Football Sports Development Limited (FSDL)-i Master Rights Agreement (MRA) yangushitsüba dak sendakba nung ken o mejangjaba ajanga linük nung top-tier league ya masayai sota atar ta July ita AIFF nem metetdaksüba sülen mepetmesü tenzük.

Iba sülen mepetmesü aika adokogo, saka timla ka agütsüba ji iba mapang Supreme Court-i AIFF constitution tasenba agizük, koba taoba apex court judge L Nageswara Rao-i renema liasü.

"ISL Club, Prospective

Commercial Partner, FSDL, Broadcasters & OTT Platform, I-League & Lower Division Club tem densema stakeholder tem ajak adenba ajanga ken o kanga junga sensaksemtettsü," ta ministry-i AIFF dangi yokba shiti nung shia lir.

Bodhdarnü Sports Authority of India (SAI) nung senden trok tashi ayonga lir, kong ISL clubs, I-League clubs aser FSDL den sensaksem balala akatsüba densema lir.

Minister-i hopta ishika tejakdang I-League representative tem den senden menogo aser stakeholders ajak dang ken o bentettsü atema inyakteptsü ayongzüka liasü.

I-League club temi top tier ISL aser I League kübok division anaprongla ya lokti tentet kati dang achaayangtsü asoshi common league partner ka asoshi takhangba agüja liasü.

PCB-i franchise league asayatsü atema asayar 12 melaogo



Luchii/December 2, 2025

(Agencies): December aser January ita bendanglen franchise league tem asayatsü atema temelaba agütsüba contracted asayartem rongnung Pakistan T20 captain Salman Ali Agha densema mali.

Pakistan Cricket Board (PCB)-i, taruba küm India aser Sri Lanka na nung T20 World Cup masaya tsüngda linük balala nung league tem asayatsü asoshi national asayar 12 nem temelaba agütsüogo. Saka contracted asayartem

rongnung Salman kija nem iba temelaba magütsü, shiba lenisüba nung Pakistan T20 team 2024 küm December ita nungi asaya arudar.

Osang ajanga ashiba agi, Salman mezüngoksemba ya pa merenshiba ka masü saka market apir telemtetba agiba lir. Tanga Pakistan nung asayartem ama pa club aikatibo maginer aser coach aser analyst tem aikati T20 cricket nung pa shilem ashishia arudar.

Team kechaia pa maginer asünung PCB-i Salman nem

temelaba magütsü.

Tanga asaya aliba season nung Pakistan nung asayartem Bangladesh Premier League (BPL), UAE nung T20 aser Big Bash League (BBL) nung asayatsü.

BBL nung Babar Azam, Shaheen Shah Afridi, Mohammad Rizwan, Shadab Khan aser Haris Rauf nung asayatsü. BPL nunga Pakistan nung asayar 11 asayatsü aser Fakhar Zaman, Naseem Shah aser Usman Tariq nung T20 nung asayatsü jangjaogo.

Ajisüaka asayartem asayamung tembanga masayatettsü akok, kechiyong PCB-i Sri Lanka aser Australia na den T20 asayamung ayongzüka asayatsü inyaktepdar.

ILT20 ya December 2 nungi January 4 tashi asayatsü aser BPL ya December 26 nungi tenzük asayatsü.

Gabba Test atema England team sangdongogo

Luchii/December 2, 2025

(Agencies): Australia den Gabba nung tanabuba Ashes Test atema England team nung Mark Wood meleno Will Jacks aniokogo. Brehostibarnü nungi tenzük Brisbane nung pink-ball asaya asoshi asayar melenshiba ya England Cricket Board-i sangdonga liasü.

"England-i Perth nung mezüngbuba Ashes Test asayaba team nung asayar ka melenogo. Spinning all-rounder Will Jacks-i yirur alisang Mark Wood melenogo," ya England Cricket Board (ECB)-i metetdaksü.

Arishi küm 35 tain Wood ya temekok tabelen nung timtem aliba ajanga masayatettsüba kümogo. Pa mapang talangka lir Perth nung asaya saka pai over 11 dang ona liasü. Iba asaya ya anogo ana nung dang tematok.

Team nung Jack bendenlokba ajanga England nem batting nung tashi talila agütsü aser pai off-spin-a onteter asünung iba ajanga team yaritsü. Iba ground nung light tsükloker asayaba

mapangbo spinner nem kanga teyari agütsü

Jacks-i tang tashi nung Test ana dang asayar lir. Pai run 89 agütsü wicket trok agir lir. Pai Pakistan den mezüngbuba asaya nung wicket pongu agia liasü.

Iba asayamung nung mezüngbuba asaya akokba sülen Australia team 1-0 agi tejakdang lir. Team ana tsüngda ano Test pezü asayatsü lir.

Australia nung taoba Test asaya 16 tashi nung England-i asaya ka danga kokteta mali, kong day-night asaya asem nung tamakok anguba densema lir. Kasa mapang nung Australia team bo day-night Tests 14 asayaba nung khen dang tamakok ngua lir. 2024 küm parnoki West Indies mekoki liasü.

England XI nung Zak Crawley, Ben Duckett, Ollie Pope, Joe Root, Harry Brook, Ben Stokes (captain), Jamie Smith (wicketkeeper), Will Jacks, Gus Atkinson, Brydon Carse, aser Jofra Archer nung densema lir.


Glenn Maxwell taküm IPL masayatsü

Luchii/December 2, 2025

(Agencies): Glenn Maxwell 2026 Indian Premier League (IPL) nung shilem magütsü. Pa taruba auction atema züngoksema aliba asayar 1355 rongnung densema mali. Asayamung atema auction ya Abu Dhabi nung December 16 nü agütsü.

Maxwell-i ashiba agi, auction nung shilem magütsü asoshi telemtetba agütsü temela masü asü, saka taoba küm 13 tashi IPL-i pa indang career nung tongtibang shilem agiba atema pelaba lemsatep. Maxwell-i pa iba asayamung asaya nungi anisüngzüker tabo shia mali mesüra tarutsü nung auction atema pa tenüng agütsü magütsü iba indanga shia mali. Temetettsü kaji pai 2019 küma Cricket World Cup atongtsü lia IPL nung masaya.

"IPL nung mamatoktetsüsa season aika asayaba sülen ni takümbo auction atema kü tenüng magütsü telemtetba agiogo. Iba telemtetba agütsü temela masü asü aser iba league-i kü nem kechisa agütsüogo item ajak atema tenüngsang iba telemtetba agiogo. IPL-i ni asayaba yimya aser nisung ka ama kü yimya melenshitsüogo. Ni tia ka-a world-class teammate tem den



club tajungtem nung asayaogo. Kümtem tsüngda nenoki ni nongita yariba atema kanga pelar aser nenok den yakta ajuruteptsü imlar," ta Maxwell-i Instagram nung zülutsü.

Maxwell ya IPL nung mezüngbuba 2013 küm Mumbai Indians (MI) nungi asaya, ajisüaka iba küm pa asaya asem nung dang asaya. Iba sülen pa Punjab Kings (PBKS) aser Delhi Capitals (DC) nungia asayaogo. Ajisüaka pai Royal Challengers Bengaluru (RCB) nungi tajungtiba asayaogo. Pa RCB nung 2021 nungi 2024 tashi asaya.

Ajak senteper Maxwell IPL asaya 141 nung asayaogo aser iba mapang pai run 2819 yangluogo aser pa indang strike-rate 155.15 lir.

BILEMDANGANG

"Ni ola tulu adoka tenüngsang agütsü saka ola tanep agi metongshitsü."